

IA PILAKKON MASIAMA ?

(Mt. 13 : 51).

**Jona - Haggai - Zekaria - Malaki
Katchinikgiparang.**

Fr. Anthony Buccieri S. D. B.

**BOSCO MOUNT
Rongkhon
1993.**

DISTRICT LIBRARY
WEST GARO HILLS-TURA

Acc. No. 242/42

Class No.

Book No.

Author Fr. O. Bucciari

Title La Pilekbon
Masiana?

Acc. No. 242/42

DISTRICT LIBRARY
GOVERNMENT OF MEGHALAYA
TURA

1. Books may be retained for a period not exceeding **15 days** by members.
2. Books may be renewed on request at the discretion of the Librarian
3. *Dog-earing the pages of a book, marking or writing therein with ink or pencil, tearing or taking out its pages, or otherwise damaging it will constitute an injury to a book.*
4. *Any such injury to a book is a serious offence; Unless a borrower points out the injury at the time of borrowing the book, he shall be required to replace the book or pay its price.*

Help to keep the book fresh and clean

IA PILAKKON MASIAMA ?

(Mt 13 : 51)



Jona - Haggai - ~~Zekaria~~ - Malaki
Katchinikgiparang.

Fr. Anthony Buccieri S. D. B.


BOSCO MOUNT
Rongkhon
1993.

Imprimatur.

+ G. MAMALASSERY, D. D

Bishop of Tura

November, 1993



**Printed at Ama Printing Press,
Na'ing Bazar, Tura — 794101.
Phone : 32545.**

K A T T A J A P A N G.

Jak.

Aganchengani	1
Jona : Odhai	1
Odhai	2
Odhai	3
Odhai	4
Odhai	5
Haggai : Odhai	6
Zekaria: Odhai	7
Malaki : Odhai	8
	10
	11
	14
	17
	26

JAKKALGIMIN KITAPRANG.

Rongtalgipa Sastro.

Kasaani Katta.

The Jerusalem Bible.

La Bibbia - Italian Sastro.

The Jerome Biblical Commentary.

Sastrooniko ambo.

Complete concordance to the Bible.

Come leggere la Bibbia (How to read the Bible) by
Bruno Maggioni.

AGANCHENGANI

IA PILAKKON MASIAMA ?

Sastro Isolni katta onga.

Katta mingprakprakan mingsako uiata ba gisik raata.

Indiba anching sakgipinni kattako masijaode ba masisretode, ua maginasa aganaha me tala aro anching uni kettaoniko mamung namgniko manja.

Iana agre gisep gisep agingipa-kattani ortoko mangsonggija-antangni kattachi minggipinko uatna ba skina mangsonga.

Mesokanina Jisu Jihukhringna aganaha : ia torom nokko rubo aro Anga sal gitamon uko cha-katatgen" (John 2 : 19) Aro John agandapa : Ua beentangni torom nokkosa aganengachim.

Iani gimin maiba toe skianiko aganenba, Jisu gisep gisep sninggiparango singengachim : Nasimang ia pilakkon masiahama ? (Mt. 13 : 51).

Jisuni Watatarang aro sninggiparang gita anchingba pilnupil simsakbee sandiesa Sastroni chong-motgipa skiako mana.

Mongsongde katchinikgiparangni searangko poraie anching simsakna nanga.

Babilonona rimangaoni Jerusalemchi rebapilmano (538 - B.C.), Jihovani aro toromni gimin

Jihudirang maiko chanchiengachim ? Ua chasongni
katchinikgiparang maiko skiaha ?

Ua chasongni katchinikgiparang Jonani kitapko
segipa, Haggai, Zekaria aro Malaki ongtha.

Adita uamangni agansoanirang Niam Gitalo
chusokatako manaha.

Pilak Kristianrang ia katchinikgipa sakbrini
kattarangko chanchibewalode antangtangni beberaako
bilakata.

JONA

Jona sawa ?

Jona, ia biningni ortoara - **paroa onga.**

Sastroo anching changsasan uni gimin poraia -
2 Ruj 14 : 25. Ua Jeroboam 2-gnigipana (786---746
B C), Israelni (Samuriani) songnokni rajana, bobil-
rangko amgen ine agansoaha.

Jonani kitap.

Daororo bangbata scholarrangna Jonani kitap-
ko sejaha ine skia.

Jona antangni gimin seje. Sakgipiasit-aro pini-
pil kalake-uni gimin sea.

Jona chetgipa chaso go, Jisuna skangan,
tangaha Iadiba Babilonni nokkol itaoni jokenba,
chongmotan bongagipa chasongo B. C., ia kitap o
seaha

Aganani bewal bongagipa chasongni bewal gita.

Banga Aramaic kattarang donga aro bongagipa
chasongosa Israelrang Aramaic kusikchi aganna
abachengaha.

Iana agre mongsongde Babilononi jokenba,
Jihudirang Jihova pilak jatrangko (Abrahamni de-
drangko sinjetahani gimin) nistatgen ine chanchiachim.

Ua somoio uamang Jonani kitapni skiako nang-achim aro ua skiani Jeremiah (Ua 645 bilsio B. C. atchiaha) aro Ezekielni (600 B. C.) searango pang-chaka.

Golposa.

Uni gimin Jonani kitap “historical” kitap kingsa ongja / ine daororo bangbata scholarrang bebe-raa aro skia.

Jonani kitap toe skiani, golposa ongaia.

Adita kitapni kattarangna simsakode, altue iako masina mana. Mesokanina : sak ritchasa kolgrik hajal mande gnanggipa songjinmako repakna (4 : 11) sal gittam rena nangja. Sal gittam reode Turaoni Baghma-raona soka. Nineve indaken daljachim.

Iana agre historical uiatanirang gri. Nineveni rajani biming mai ? Assirianrangni itihaso Nineveni raja saksa aro uni raiotrang gisik pile Israelni Isolo beberaaha ine sakki gri.

Natok mai biapo Jonako wakgalaha ?

Kitapni skiani.

Ia golponi skiani ian : Isol pilak manderangna kasaa aro pilakon jokatna ska.

ODHAI 2^o

DAKMESOKANI.

Jonani Kitapo kitapni biming aro aganchengani katta gri.

Jona katchinikgipa onga ine kitapo sea dongja.

Manderangni, biaprangni, bosturangni sulsul agananiba (description) gri.

Agangrikani aro dakanisa donga.

Iani gimin Jonani kitap **dakmesokani** (drama ba film) gita onga.

Dakmesokgiparang :

- a) Isol.
- b) Jona.
- c) Jahat chogiparang.
- d) Nineveni manderang onga.

Jona Israelrangko-arō pilak kitapko poraigiparangko-mesokani onga.

Jahat chogiparang toromigipa manderangko mesoka. Uamang sakantian antangtangni Isolna grapaha (1 : 5) aro Jihovanaba boliko onaha (1 : 16).

Nineveni manderang toromgri manderangko mesoka.

Dakmesokani bakrang.

Ia dakmesokanio bakgni aro gisepogipa somoi
(interval) donga.

Sagipa bakko **nikani** (scenes) minggittam aro
gnigipa bakko nikani minggni donga.

ODHAI 3

KITAPNI NIKANIRANG.

Sagipa nikani : 1 : 1 — 13.

Biap : Joppa (dao Jaffa), sagalni rikamo. Joppa Jerusalemoni mail 30-mang cheloba, uni jahat karam ongachim.

Dakmesokgiparang : Isol aro Jona.

Bano ? Mai somoio Isol Jonana Antangni kat-tako aganaha ? Kitapo iako seja.

Ua Isolni katta, dingtangmancha chasongna onggiya, pilak chasongrangni manderangko skiani aro mikrakatani onga.

Jona Isoloni chelachi katange, Tarshishona reangna mangsongachim.

Tarshish Spain asongni dalgipa songjinma dam-sa ongachim. Uno silni ostrorangko aro jahatrankoba tariachim.

Maina Jona Isoloni katangenga ?

Iako jamanosa talatgen : 4 : 2. Jona-arō Israel-rang-Isol kasagipa, kasachakan gapgipa, kaonangna kasingipa aro gisik pilgiparangko kema kagipa onga ine chanchijachim.

Gnigipa nikani : 1 : 4 — 16.

Biap : jahato, sagalo.

Dakmesokgiparang : Isol ;

Jona ;

Jahatni chogiparang aro
pamong.

Darangba Isoloni katangna manja. Isol jeoba
donga. Dao Isol tarakbegipa balwako sagalona watata.
(1 : 4).

Jahat chogiparang uko ritchengatna balrangko
sagalchina galata aro antangtangni Isolrangna grapa.
(1 : 5).

Indiba Jona jahatni ningbatgipa biapona
napange tuenba tusibeenga. (1 : 5).

Ua Isol baksa meligrikja aro songsulrang bak-
saba meligrikja.

Jahatni pamong uko ama, Ua bangako singja.
Jona bebeko agana aro Jihudi onggi jagiparangko skina
mangsongjaoba, Jihova Isol sagal aro agako **Dakgipa**
onga ine kurachaka. (1 : 9).

Jona Isolni kattako manigijagipa onga ongade.
Indiba daoba ua bebegipa toromko galja.

Jonani kattarangko knae, jahat chogiparang
namnikjaoba uko sagalchina galona. (1 : 16).

Gittamgipa nikani : (2 : 1 — 11).

Biap : natokni okningo.

Dakmesokgiparang : Isol aro Jona.

Daoba dakchenggipa Isolsa.

Ua Jonana aganaha (1 : 1).

Ua tarakgipa balwako watataha. (1 : 4).

Ua dao Jonako minokna natok dalbeako
donsoa. (1 : 7).

ODHAI 4

JONANI BIANI.

Ia biani - 2 : 2 - 11 - dakmesokani interval ba gisepogipa somoi gita onga.

Bangbata scholarrang ia biani sedapanisa onga ine agana.

Aganani (language) dingtang onga. Aramaic kattarang dongja. Biani jokatako manahani gimin Isolko mittelani git (psalm) onga. Indiba Jona natokni okningo dongkuenga ; jokatako mankuja.

Iana agre git Jona gisik pile Jihovani namnika-ko rachakaha ine agana. Indiba jamano (4 : 1) ua Jihovani kasachakaniko namnikatjabeaha aro kaonangaha ine sea gnan.

Sedapani ongoba ia git kitapni mongsongbat-gipa skianiko rachakna aro beberraana anchingko tarisoa : Isol Uni kattako manigijagipa Jonakoba kema kaa aro aselrangoniko jokata.

ODHAF 5

NINEVE.

Brigipa nikani :

Biap : Nineve.

Dakmesokgiparang : Isol - Jona -
Nineveni manderang.

Daoba dakchenggipa Isolsa : **aro Jihovani** katta
Jonaona gnigipa chango rebae aganaha. (3 : 1).

Nineve Assirianrangni skotonggipa songjinma
ongachim. Assirianrangan 722 bilsio B. C. Israelni
(Samariani) songnokko nisiataba. ~~Indiba~~ Jona
Jeroboam 2-gipani somoio (786—746 B. C.) Israelni
songnoko tangaha.

Jonani kitapo ua dao Isol hajak **sokgen aro**
Nineveko nisiatgen ine aganpraka.

Ua : gisik pilbo ine didija. Uni katta ~~sastini~~
giminsa onga : Sal sotbri dongkua aro Nineve pang-
pilako mangen. (3 : 4).

Sal sotbri : ia kattarang dubiani sal sotbriko
(Abach. 7 : 17) aro agisio brangani bilsi sotbriko gisik
raata. (Reonk. 12 / 1 Rāj. 19 : 8).

Nineveni manderang gisik pilgen, gisik piljawa
-iako Jona uija.

Antangni chasongni Jihudirang gita, Jihova
Jihudirangko sinjetgiparangko nisiatgen aro Jihudi-
rangko rasong chaatgen ine ua chanchia.

Indiba Nineverang gisik pilchongmotaha aro
Isol uamangko kema kaaha.

Indide Isol pilak manderangna kasaa aro pilak-
ko jokatna ska.

Ian kitapni skiani aro ian bonchotgipa kitapni
katta onгна man'genchim.

Indiba aro

Bongagipa nikani donga. (4 : 5 — 11).

Biap : Nineveni salaramchipakchi biap damsa.

Dakmesokgiparang : Isol - Jona
Korondat bol pangsa.

Ia bak Jonako aro pilak kitapko poraigiparang-
ko mikrakatani onga.

Jona kadongachim aro namnikachim gita,
Nineve nisiatako manja.

Jona kaonanga (4 : 1). Uni beberaani ong-
gramaia. Una "tangana bate sian nambata" (4 : 3).

Uni rikgipa jamdap sambao korondat bol pang-
sa chaa, dalbaa aro uko salakimdapa.

Indiba sal gipino ua korondat bol sikrapaha
(4 : 6 — 7).

Jona korondat bolko gejamachim. Uko dalatna kam kajahachim. Indakoba dao uni gimin ua duk mana.

Isol rebae uko (aro anchingkoba) skia aro mik-rakata : Naa jena nengkuja ba jeko naa chaatkuja..... naa korondatna kasachaka. Indide Anga dalbegipa songjinma Ninevena , sakritchasa kolgrik hajal manderangna aro banga jillanirangna kasajawama ? (4 : 10 — 11).

Kitapo Isolni singanina aganchakani dongja.

Gisik senge kitapko poraire anching aganchakna nanga :

Jokatgipa bebaraani uianisa ongja. Jokatgipa bebaraani : Isolni namnikako rachakani ; Isold biani ; Isolni kattako maniani ; kasachakani; tomtomani onga.

Isol anchingo singa : Nasimang ia pilakkon masiahama ?

ODHAI 6

HAGGAI.

Cyrus, Persia asongni raja (600—529 B. C.), Babilonianrangko amenba, Babilonona rimangako mangipa Jihudirang Jerusalemchi reangpilna aro antangtangni torom nokko riktaina mangel ine rai onaha.

Ua Nabukadnessarni Jerusalemni torom noko-niko raanggimin sona aro rupani jakkalanirangkoba raangna geetaha. (Esdra 5 : 14 — 15).

Sheshbassar skanggipa rebapilgiparangni dolko redilbaaha.

Haggai (jeni bimingni ortoara “feast”—katcha-ani onga), aro Zekariani (ia bimingni orto : Isol gisik raaha ine onga) didiachi rebachenggiparang torom nokko riktaina abachengaha.

Indiba je manderang Jerusalemo aro sepang jolo songdongahachim, bilonge champengaha.

Iana agre torom nokko riktaina nanggipa bosturangba chuongjachim. Iani gimin manderang : Jihovani nokko rikna sal sokkuja ine aganna abachengaha. (1 : 2).

Unon Zerubhabel gnigipa dolko redilbaaha. Zerubhabel Davidni nokoni aro Judhani songnokko manrikginigipa ongachim.

Dao Haggai aro Zekaria, Jihovani bimingo, pilakkon torom nokko riktaianiko matchotna didiaha, (Esdra 5 : 1 — 2).

Gital torom nokko 515 B. C. bilsio pattiaha aro Isolna onkangaha.

Haggaini katta.

Cyrus simano Cambyses raja ongskaaha. Ua Egyptni asongko amjani gimin antangko sootaha aro ram ram mande saksa, Gaumata, asongni bilko rasekaha.

Indiba Darius uko arikaha aro Persiani raja ongskaaha (521 — 486 B. C.).

Uni gniggipa sason kaani bilsio Haggai skina abachengaha.

Uni seanio anching aganani mingbongako poraia :

1 - Odhai 1 : 1 — 15. - Babilononi rebapilgiparang ansengja maina uamang antangtangni giminsa chanchie, antangtangni nokrangko rikna gisik nanga aro torom nokko rikna gisik nangja.

Unon uamang Haggai katchinikgipani kattarangko knachake (1 : 12), kotokrangni Jihovani nokko rikna krengha. (1 : 15).

2 - Odhai 1:15—2:9 - Gitcham torom nokna bate gital torom nok rasong chabatgen, maina (2 : 6) Kotokrangni Jihova indaken agana : Ontisani jamano anga salgirangko aro aako aro sagalko aro

agako moatgen aro Anga pilak jatrangkon
moatgen. (2 : 7).

Isolni mikkango bilsa hajalsa salsa gita onga.
Ontisani jamano, chongmotan adita, bilsirangni
jamano, Isol kurachakgimin Kristoko ba Messiahko
watatgen aro Ua pilak jatrangko jokatgen.

Jokatgipa Jisuko ia gital torom noko Isolna
pakwatgen. Ua ia torom noko aganprakgen aro mani-
gen.

Uni gimin (Haggai agansoaha : 2 : 9) : Ia nokni
jamanggipa rasong skanggipa rasongna bate dal-
batgen.

3 - Odhai 2 : 10 — 14 - Sastroo sea gnanng gita, Niam
gita, rongtale Isolko manibo.

4 - Odhai 2 : 15 — 19 - Torom nokko rikahani gimin,
Jihova jaksrambee chaanirangko aro pattianirang-
ko ongen.

5 - Odhai 2 : 20 — 23 - Zerubhabel Isolni seokgimin
mande onga. - Ua Jokatgipa Jisu Kristoko mesok-
soani ongachim.

Haggaini skiani.

Ningtue nioa, Haggaini kusikchi Isol ia skiani-
ko pilak manderangna onna mangsongaha ine anching
masina mana.

Pilakna skangan aro pilakni kosako Isolko
chanchibo aro manibo. Unon Ua hangna patigen.

ODHAI 7

ZEKARIA.

Zekaria Aggaini salrango Jerusalemo IsoIni kattako aganprakaha.

Ua antangan agana gita, bilsio gnisa (November jaoni 520 B. C. - December jaona 518 B. C. bilsio) manderangko skie didiaha. (Zek. 1 : 1 / 7 : 1).

Uni pagipa kamal saksachim (Ezr. 5 : 1). Iani gimin Zekaria torom nokni manianirangko aro dalgipa kamalni (Joshua-ni) bilko dalnika.

Zekariani seani.

Zekariani kitapo odhai 14 donga. Indiba daoro-ro bangbata odhai 1-gipaoni, odhai 8-gipaonasa Zekariani kattarang onga ine chanchia.

Odhai 9 - 14 - o nikanirang dongjajok. Torom nokni, Zerubabelni aro Daudni nokni bilni gimin katta gri.

Aganani ramram aganani onggija, poetrysa (gitrang) onga.

Iana agre, 9 : 13 Greece asongni bilko gisik raata. Indiba Zekariani somoio (520 B. C.) raja Alexander (356 — 323 B. C.), Greece asongni bilko rikgipa, atchikujachim.

Gipin prophet saksa, jeni bimingko anching uija, gnigipa Zekariani kitapni bakko seaha.

Zekariani skiani.

Pilnipil Zekariani aganako talatna nengnik-beani kam onga.

Banga chang nikanirangni mangsongani talia, maina anching Katchinikgipa maini gimin aganna mangsonga, uko masija.

Jeremiani aro Ezekielni nikanirang tala. Uarang “chinrang” onga aro anching ia katchinikgiparang maini gimin aganna mangsonga, iako masia.

Jeba ongchina, banga Zekariani agansoanirang Jisuo chusokatako maaha ine anching gisik rana nanga.

- 1 - Jisu gada bisao gakate Jerusalemo napaha :
Mat. 21 : 5 / John 12 : 14 / aro Zek. 9 : 9.
- 2 - Judas tangka kolatchiko rae Jisuko bobilrangni jako onaha aro antangko kae siria skangan, ua tangkarangko torom noko galaha : Mt. 27 : 3 — 6 / Zekar. 11 : 12 — 13.
- 3 - Mes nirikgipako dokbo aro mesrang bilding bildang ongen : Zek. 13 : 7. Bonkamgipa meatamo Jisu Antangni gimin ia kattarangko seahachim ine aganaha : Mt. 26 : 31.
- 4 - John 19 : 37 sea : Sastro agana : uamang jeko suaha, ukon uamang nikgen. Ian Zekariani katta onga : Zek. 12 : 10.

Iana agre Zekariaba bonkamao Jihova Jerusalemkong rontalatgen aro jokatgen ine agana : Zek 13. - : Aro nibo, Jihovani sal rebaa (14 : 1). Ua salo gital aro salgionigipa Jerusalem donggen Ua salo sengani ongjava Sal onggiya, waalba onggiya senggen Jerusalemoni tanggipa chirang onklatgen....Dingkario aro siikario, asan onngen....Ua salo Jihova saksan aro Uni bimingko minggen. (Zek. 14 : 6 — 9).

Zekariani kittapni bakrang.

Kosako anching aganaha gita, Zekariani kitapo bakgni donga : Bak I : odhai 1 — 8. Ia bako anching Zekariani nikani mingchetko poraia.

Nikanirang :

1 - Gurerango gakatgiparang : 1 : 7 — 17. Uamang sagerang onga. Isol uamangko aako rerorochina watata. (pod 10) aro uamang aa tomtom onga ine nika.

Mitam chanchia : aa dao tomtom onga maina Darius golmal kagiparangko amaha. Indide dao Jihova Jerusalemkong riktaigen (toani buduko uni kosako sringgen) aro Jihudirangko rasong chaatna rebagen (pod 14 — 17).

2 - Grong febri aro mistri sakbri : 1 : 19 — 21.

Sastroo grong bilko mesokani onga. Jatrang antangtangni bilchi Jihudirangko bilding bildangataha....Indiba dao Isolni watatgipa mistrirang (chongmotan sagerang) ua bilko beatgen.

3 - Jerusalemko togipa mande : 2 : 1 — 13.

Skangna bate dao Jerusalem dalbatgen. Kurachakimin Jokatgipa (Messiah) rebagen aro pilak jatrang jokatako manna Jerusalemchi rebagen.

4 - Kamal Joshuah aro Saitan : 3 : 1 — 10.

Riktaigimin torom noko kamalrangko nanga. Babilonona rimangako manna skang, kamalrang brangachim : indide Joshuah moila gananirangko gana. Dao uko rongtalata aro nitogipa gananirangchi ganatgen aro una gamchatbegipa roong dotsako ongen. Bangbata ia roong gital torom nokko mesokani onga ine chanchia.

5 - Sonani gasa aro joitun bol panggni : 4 : 1 — 14.

Ia gasa gital torom nokko aro gital gisiko ongkipa Jihudi jatko mesokani onga.

Johshua aro Zerubhabel (joitun bol panggni) dao torom nokna aro asongna simsaka aro tengsu-atako ona.

6 - Bilenggipa lekka dolgimin : 5 : 1 — 4.

Ia lekka dala. Uni gro (30 put) aro gipeng (15 put) Solomonni torom nokni mikkangogipa baranda gita onga. Ua lekkao sea gnang gita gital Israelo (i. e. Messiahni songnoko) kakket dakgijagiparangko niasiatgen.

7 - Ephani ningo mechik : 5 : 5 — 11.

Epha-ko mi, gom, misiko....tochakna jakkalachim. Kok gita. Ephani ningo donggipa mechik aro gipin

mechik sakgni Israelni gisepo donggipa paprang aro namgijarangko mesokani onga. Dao gital torom noko rongtalatani Isol danga. Pilak rongtal-gijarangko chelachi (i. e. Shinarchi....Babilonchi) raangna nang.

8 - Rot gebri : 6 : 1 — 8.

Jihudirang iachi uachi gopripraha aro banga Jeru-salemchi rebapilkuja. Uamangba salgro, salgipeng, salaram aro saliramni rongtalatako aro jokatako manna kurachakgimin Messiahni songnokchi rebagen.

Ia nikani mingchetko gisik raatmano, Zekaria Isol una agantaiaha aro **Mukut stikani gimin** (6 : 8 — 15) uko skiaha ine sea.

Torom nokko riktaiaha aro Jihudirang asong damsa ongtaiaha. Ia asongni dilgiparang aro sason kagiparang Zerubhabel aro Joshua onga.

Zekaria manderangni kasae onanirangko chimonge, mukut gesako tarigen aro Zerubhabelni skoo uko stikatgen.

Zekaria iako dakbebeahama ? Ba ian nikani gitasa ongahama ? Ian talja.

Indiba dao Zerubhabel cheksi gita onggen. Ia cheksi dalgipa bol pangsa onggen aro uni ningo Jihudirangni jat silbataigen.

Bak II : odhai 9 — 14. (Abachengani odhai 7 aro 8-gipaoni onga.

1 - Okumu chakani gimin : odhai 7.

Torom nokko riktaiaha. Indide daoba Jihudirang okumu chakna chongmotan kalimna nangama?

Zekaria Isolni bimingo aganchake : Bebegipa torom okumu chakani ongja. Indiba bebegipa torom kakket dakani aro kasagrikanisa onga ine skia.

2 - Gital songnok : odhai 8.

Gital Jerusalemo aro gital songnoko (chongmotan Messiahni songnoko), katchaani aro ansengani donggen. Iani gimin gipin jatrangba uachi rebagen.

3 - Messiahni songnokni gimin agansoani : odhai 9.

Alexander, Macedoniani raja (336 - B. C.) Persian-rangko amenba, Damaskus, Sidon, Tyre aro banga gipin songrangko nisiataha.

Ia Zekariani bakko segipa Messiahni chasong sokbaaha ine chanchiaha. Ua kakketgipa chegipa aro sontolgipa onngen (pod 9). Ua Jihudirangko jokatgen aro rasong chaatgen.

4 - Gital obosta : odhai 10 / odhai 11 : 1 — 3.

Theraphim (miterangni statuerang) aro tole katchi-nikgiparang togia, indiba Jihova patichongmotgen. Ua jatrangni dilgiparangko (nirikgiparang aro dobok biparangko (pod 3) onatgen.

Pilak Jihudirang - Juda, Joseph, Ephraim ma-chongrang) kumonggriktaigen. Uamang bobilrang-co amsranggen, Jihovao bilakgen aro Uni bimingo rasong chagen.

5 - Mesrangko nirikgiparang : odhai 11 : 4 — 17.

Israelrang Jihovani mesrang onga. Katchinikgipa Jihovani palo uarangko nirikna nanga aro mesrang-na simsakgijagipa nirikgipa sak gittamko arikna nanga.

Indiba mesrang-chongmotan Israel - Jihovana bamja aro katchi nikgipana dormahako one (rupa shekel kolatchiko, Mt. 25 : 15) uko arika.

Dao mesrang namgijagipa nirikgipani ningo gaaka, indiba ua sao aro sastiko mangen.

Kragijagipa mes nirikgiparang sarang ? Mai somoio uamang mesrang nirikna abachenggen ? Ian talja.

6 - Jerusalem aro Juda jokatako mana : odhai 12. Odhai 9 — 11 sedapani onga ine anching kosako aganmanaha.

Mitam mitam odhai 12—14 ba gipin chasongni sedapani onga ine chanchia.

Adita Jihudirang kadongahachim gita, Alexander rajani chasongo Jerusalem rasongko manjaha. Batesa Alexanderni simano, uni sipaini pamong-rang Jihudirangko bilongen sinjetaha.

Indiba Jihova Jerusalemna aro Judana warachakgen (12 : 1—9). Israel gisik pile kalimngen jekai kalimaha je somoio Josiah raja Megiddoo sootako manaha. (2 Ser. 35 : 22 — 24).

7 - Jerusalemko aro Israelko rongtalata : Odhai 13.

Jerusalem jokatako manaha.

Seanio Makkabeerangni chasongni jokatako gisik raatengama ? (66 — 37 B C.) Iaba talja.

Jeba ongchina, dao Israel rongtalatako nanga aro Isol Jerusalemni songdonggiparangna chimik dilsako ongen. (pod 1).

Jerusalemo dao torom nok aro dilgipa kamalrang donga.

Rजारारंगको नान्गजोक अरो कचिनिकगिपारंगको-बा नान्गजोक. (pod 2—6). Indiba dilgiparangni kosakoba tonual (sasti) donggen (pod 7) aro uamang gisik pile rongtalatako mangent (pod 9).

8 - Gital Jerusalem : Odhai 14.

Ia odhaio anching dingtang dingtang agansoanirangko poraia. Uarangko “apocalyptic style-chi” sea, chongmotan je onganirang agilsakni bonkamgipa salrango (Jihovani sal) onngen (pod 5/12—15), daororoni obostako mesokani onga.

Jerusalem (i. e. Israel) duk mangen (pod 2). Indiba Jihova una warachakgen (pod 3).

Banga dakgrikanirang aro jajrenganirang donggen. Bonkamao Jihova pilak bobilrangko amsranggen. Gital Jerusalem donggen aro pilak jatrang tamburangni alaniko manina Jerusalemchi doanggen.

Jihudirangna tamburangni salrang (salsnina uamang jamdaprangong dongachim) Isolko mitelani salrang ongachim, maina Jihova uamangko agisio chelchakachim (Leb. 23 : 43) aro jamanoba jak-srambee pangnan uamangna patiahachim.



ODHAI 8

MALAKI

Malakini kitap bonkamgipa Niam Gitchamni seani onga.

Malaki sawa ? Iako anching uija.

Mitam chanchia : Malaki mandeni biming ongja, maina Hibru kusikchi ia kattani ortoara : “Gitelni watatgipa” onga.

Kitapni kattarango pangchake ia kitapko segipa 460 — 430 B. C. bilsirangni gisepo skiaha ine anching chanchina mana.

Ua toromigina Jihudi mande saksachim, torom nokna kasagipa aro “kumonggrikanina” gisik nanggipa

Uni aganani “catechism” gita onga : singani aro aganchakani.

Malakini skiani.

Ua somoio Babilononi rebapilgiparang torom nokko riktaina kamrangko matchotahachim.

Indiba uamang kadongachim gita, jatni silroro -namroroani bao ?

Katchinikgiparang tole aganahachima ?

Daoba Jihova Israelni kosako kaonangengachima ?

Malaki Jihova Israelna kasachongmota ine skia (Mal. 1 : 2). Uni kasaani chin mingsa ian : Jakobni jatko (Jihudirangko) Ua riktaiaha.

Indiba Esauni dedrangna (Edomiterangna) kadongani dongjachim. (1 : 2 — 5).

Kitapni bakrang.

Indakoba Israel Jihovana simsakja. Iani gimin Jihovani bimingo Malaki Jihudirangko mikrakatna aro skina banga matnangani kattarangko sea.

1 - Kamalrangko matnangani, maina uamang kragija-gipa onanirangko boli ona (Mal. 1 : 6—14/2:1—9).

Uni gimin Kotokrangni Jihova aganaha : Anga nasimangni jakoni boliko rachakjava. Maina sal nabaramoni uni napangramona, jatrangni gisepo Angni biming dalgen. Aro biapantion angni bimingna chachatko aro rongtala boliko ongen. (pod 11).

Ia agansoanio Malaki gital bolini gimin agana. Ia boliko :

- a) je biapoba ongen. (sal nabaramoni sal napangramona).
- b) jatrangni gisepo ongen (Jihudirangni giseposa onjava).
- c) ia boli rongtala boli onngen.

Badia bolini gimin Malaki agansoaha ?

Scholarrang dingtang dingtang talatanirangko onaha. Indiba anching mingsa minggniko gisik rana nanga.

Jihudirang Jerusalemni torom nokosa boliko on-rongachim.

Songsarekrangni bolirang Isolni mikkango rongtal-gipa bolirang ongjachim.

Iani gimin Malaki Messiahni songnokni bolini gimin agansoaha ine tala.

Jisu Sko bikrok abrio ia boliko onaha aro dao Mondoli salantian je biapoba uko ontaia (Missa boli).

2 - Jinmako matnangani : 2 : 10 — 11.

Pilnipil Jihudirang Isolni Niamko manijachim aro Isol iani gimin uamangna sastiko onaha.

Dao jinmako matnangani asel ian : banga nam-pinike dake songsarek mechikrangko kimaha aro banga antangtangni pantemitingni jikko galaha (pod 15).

Indiba niam gipin jatni mechikrangko kimna bengachim (Nehem 13 : 23 — 29 / Ezra 9 — 10) aro Isol jik se galgrikaniko mitchia. (pod 16).

3 - Beberagijagiparangko matnangani : 2 : 7 / 3 : 5.

Mitam mitam kalstape Isol namgijagiparangna chaka aro kakket bichal kaja ine agana.

~~Indila~~ Isol kragija dakgiparanko bichal kana rebachongmotgen (3 : 5).

Indakmitingo antangni rebaako tarisona Ua antangni sagreko watatgen.

Pagitchamrang, Moses, Katchinikgiparang, Ezra ...Isolni "sagrerang", chongmotan Uni namnika-ko uiatgiparang ongachim.

Jisu John Napbolatgipa Isolni watatgipa sagre (uiatgipa) ongachim ine aganaha. (Mt. 11 : 10).

4 - Niamko peani : 3 : 6 — 12.

Gipin matnangani asel ian : bangan Niamo sea gnang gita (Deut. 14 : 22 / Leb. 27 : 30), bak chikungni baksako torom nokna onja. (pod 8 — 9 — 10).

Israel Niamko manichina aro Jihova una patigen.

5 - Isolni sal : 3 : 13 / 4 : 1 — 6.

Gipin matnangani asel ian : Mitam agana : Isolko olakiara onggramaiani onga (pod 14). Gaora degiparang suk onga ; namgijako dakgiparang mang-rakatako mana (pod 15).

Indiba Isolni "donsogimin sal" donga (pod 17). Uan "dalgipa aro kengnigipa sal onngen" (4 : 5). "Unsalo kakketgipa aro denggugipani gisepe ; Isolko

manigipa aro manigijagipani gisepe ~~dingtanganiko~~
nikgen. (pod 18).

Ua salna skangan Isol Elija katchinikgipako
watatgen (4 : 5).

Ia watatgimin katchinikgipa John Napbolatgipa
ongaha ine Jisu skaha. (Mt. 11 : 14 / 17 : 10 — 13 /
Luk. 1 : 17).

Indide anching Malakini agansogimin “Isolni
sal”, Jisuni rebaani sal ongaha ine masina mana.

—————



Call No. _____

DUE DATE

This book should be returned on or before the date last marked below. A fine will be charged for each day the book is kept over - time.

2 255